

佛說善夜經

唐三藏法師義淨奉 制譯

如是我聞一時薄伽梵在王舍城竹林園所
去斯不遠有一苾芻住溫泉側時有一天顏
貌端嚴光明殊妙過初夜分詣苾芻所彼天
威光周圓赫弈悉皆照耀普徧溫泉合掌禮
敬在一面坐白苾芻言大德仁頗先聞善夜
經不苾芻答曰我未曾聞如是經典復問天
言仁先知不天曰我亦不知苾芻曰誰有知
者天曰無上慈父在竹林園仁今可往詣彼

請問如佛所說當奉行之說是語已忽然不
現時彼苾芻至天曉已詣世尊所頂禮雙足
在一面立白言世尊昨夜有天過初更後來
詣我所光明照耀周徧溫泉而問我言仁頗
先聞善夜經不我言未聞我問彼天仁先知
不答言不知我復問言誰有知者彼言無上
慈父在竹林園仁可往問如佛所說當奉行
之說是語已忽然不現我緣斯事故來至此
請問世尊佛告苾芻汝識彼天不答言不識
汝今當知彼是三十三天勝妙天子威德大

行六

十八

將名曰梅檀為欲利益諸衆生故來覺悟汝
問是經名時彼苾芻復白佛言世尊我今願
聞善夜經典惟願世尊哀愍為說爾時世尊
告苾芻言此善夜經具大功德若有聞者能
斷煩惱速證菩提汝等諦聽善極作意吾當
為說過去諸法不應追念未來諸法亦不希
求現在諸法勿生染著如是行者名真解脫
爾時世尊即說頌曰
過去不應念 未來不希求 於現在時中
皆如法觀察 妄想心難遣 智人應善觀

宜可速勤修 焉知至明日 由彼死王來
與汝鎮相隨 是故我牟尼 善夜經今說
常願諸有情 離苦獲安樂 不造諸惡業
恒修於衆善

爾時世尊為欲利益一切衆生今於長夜得

行六

十九

安隱樂離諸障惱於生生處增長善根常遇
三寶不墮惡趣復更說此陀羅尼曰

怛姪他 毗尼婆引喇你 跋陀摩單滯

摩臚你撒撒撒撒 瞿里健陀里 旃荼里

摩登祇^上聲薩囉爛帝 莫呼刺臚攝鉢利

斫羯囉婆引枳 攝伐里莫訶攝伐里 步

精揭引列你 你弭你名揭你訖栗多引你

莎引訶引 僧拽體天移曇去聲 頰嚩伽帝

捺囉伽帝 謗蘇迦波引囊 劫布得都谷切

迦波引囊 答布檀泥去聲莎訶

若有苾芻苾芻尼鄔波索迦鄔波斯迦及餘
善男子善女人等於此善夜經中若一伽他
若一句呪讀誦受持供養尊重明解其義爲
他演說當知是人於一切時無諸灾厄亦無
非橫及諸衰惱能知過去七生之事亦不忘

失大菩提心決定能趣涅槃正道若有善男
子善女人受持讀誦此善夜經者於未來世
所生之處必定當得宿住之智常受尊貴安
隱快樂復說頌曰

此人一切時 無有枉橫事 由造順時業

永離非時死 擁護諸衆生 令離病憂怖

不祥及惡夢 險路常安隱 若男子女人

戴持此經者 具相人敬重 所願皆圓滿

若於身語意 所有諸不善 由此經威力

終無有惡報 若水火王賊 雷電毒害等

怨家戰爭時 念經皆得脫 又復有明呪
若能讀誦者 於一切時中 長善滅諸惡

即說呪曰

怛姪他 你弭尼達哩 窒哩盧迦引盧
枳你 窒哩輸攤陀唎你惡矩比 姪哩底

奴麗 矩都軍底 矩都屈此 雞唼底矩

比你 擁護擁護我某甲於一切恐怖處於
一切疾病苦痛處於一切憂愁相惱處於一
切毒蟲毒藥處於一切鬼魅厭禱處於一切
王賊水火處於一切猛獸驚怖處於一切謗

謗言訟處於一切冤家鬭爭處於一切身意
惡業處所有語業四過處於一切厄難危亡
處并執金剛神常擁護我某甲并諸眷屬莎

引訶引

復說呪曰

怛姪他 唎哩唎哩弭里一里 畢舍脂鉢

拏 攝伐里止里莎訶

爾時世尊說是經已時彼苾芻及諸大眾人
天八部諸鬼神等皆大歡喜信受奉行
佛說善夜經